

三昧弘道廣顯定意經卷第一一名入金絲一

西晉三藏法師竺法護譯

得普智心品第一

聞如是一時佛遊王舍國鷲山之頂與大比丘衆千二百五十人諸菩薩八千人俱于時世尊廣爲無數百千諸衆之所圍遶敷演說法爾時有龍王名阿耨達此言無熱宿造德本遵修菩薩堅住大衆行六度無極以具滿相勤救衆生化導無極曾事九十六億諸佛積累功德不可稱數執權方便普見五道拔諸愚

冥使修菩薩無欲之行懷慈四等濟度一切傷愍罪類故現爲龍化龍億數使免殃行自處于池率諸眷屬八千萬衆又將姝女十四萬人周匝導從調作倡妓其音和雅乘龍感動協懷威德神變自由齋衆雜華奉最妙香擎持幡蓋而詣世尊至輒稽首敬問如來尋以所持香華雜寶繒綵幡蓋重調音樂欣心敬意與衆眷屬及諸姝女俱進詣佛則前長跪肅然叉手而白佛言欲問如來無著平等最正覺菩薩所應行道當云何惟蒙聽許乃

能敢問爾時世尊告龍王曰恣汝所問勿疑
勿難所欲如來至真等正覺當隨敷散解釋
汝心時阿耨達得爲神尊所聽質疑心益欣
悅而白佛言天師最尊人中聖導猛如師子
感變無量吾問如來普及衆生亦爲菩薩大
士之故爲世師者拔過俗法志行清淨明盡
因緣濟度羣生作無請友心普安救誘育立
之執持無畏十種力進伏衆魔降諸外道心
無穢行被堅金剛大德之鎧志不有倦積德
因緣不可計量施戒忍進定智已備心等一

切蠲除雜想棄捐二見以越智度解因緣法
已入深奧難極之法要去離聲聞緣一覺念
不捨大乘一切智心意行堅強常得自在身
淨無垢暉曜明徹志若虛空無數諸劫意不
倦者逮獲總持降除貪穢自大貢高等如逝
者空無相願以過如住夢幻影響野馬水月
於斯諸法等解不動重三寶教奉而敬之轉
其法輪而無所礙忻悅信樂皆自得之如優
曇華億世希出志靜安獨普有具相宿樹恭
恪明賢大士遵修上義法住若此爲彼正士

故問如來惟願如來至真等正覺解說菩薩
大士所行得遊法門入金剛德果達深妙使
其修應獲總持場以四諦行順化聲聞使解
要真導衆緣覺靜起因緣獎以一心使等正
覺欲達諸法當入大乘曉入大乘能伏魔場
散棄疑結過度罪惱普知衆生意志所行積
最辯達布演諸法隨一切願化示所欲善哉
世尊如來無著平等正覺廣爲賢明大士之
故普弘演說使諸菩薩得致智力降已自大
得法上力曉解殃行不有所造使得施力所

有無惜惠不望報使得戒力等除衆罪而過
諸願使得忍力於諸苦法受生之處身命無
惜得精進力積衆德本志常無倦使得定力
善寂居靜解定要行使得慧力而過邪見疑
冥昧昧曉權方便濟度衆生明了勸助具達
五通天眼無限徹聽知心神足明宿以此遊
樂果大辯才辯才句義無盡不斷便得總持
志無恍惚令逮海印三昧正定進隨普智果
同一味得佛志定習樂通行永常奉尊而無
障蔽逮法志定勉進定意長久聞法都無限

礙崇衆志定普令一切奉不退衆得施志定
俗貨法施不有遺惜具足於戒行念靜定使
速得佛心而無忘昇天志定常念梵術一生
補處志樂菩薩清高之行爾時龍王質疑畢
訖悅心怡懌重以讚頌啓問世尊

大仁願說現世義 菩薩德行所當入
內性志操所應修 興發何道行云何
順導以慈行入悲 喜以度衆護濟念
弘化定智使清淨 願垂哀傷而普說
誘衆止意及意斷 根力神足行如是

演道七覺散示衆 願說彼德所應奉
施調檢戒德具足 忍力普行及精進
慧志因緣轉無量 云何度彼蒙說之
辯才通達免愚冥 志行詳審常清淨
諸起生者即覺知 惟願爲諸菩薩說
欣悅之德有勸豫 聖種七財是行最
樂遊閑居及修靜 惟蒙慈尊廣敷說
辯才行具云何得 深致總持永安住
弘法要說常無斷 聞輒奉行終不忘
寂滅清淨而行觀 覺意深邃智廣博

其慧難究德無邊 解行云何應菩薩
制持魔力與怒意 毀壞外道衆邪類
勇德難動若太山 月明至極弘說之
曉空無相性所在 解了野馬及幻法
夢想體像計皆無 惟願世尊指示說
於是世尊告龍王曰善哉善哉快甚無比乃
自發心啓疑如來今汝所問承宿功德已顯
大悲爲衆志友不勞生死弗斷三寶王之質
疑用是故也聞以諦聽受而思惟吾當廣說
菩薩大士應所修行彼此無限果最要法時

龍王言大善世尊願樂思聽聞輒受行宣布
十方勸進無倦於是世尊答龍王曰有一法
行菩薩應者相好備具得諸佛法何謂爲一
造起道意不捨衆生是謂一行致諸佛法又
有三十二事得普智心當勤樂行專意守習
何謂三十二御修內性執上最志昇行大慈
堅固大悲志慕無厭發於精進仞具猛厲而
得強力又踰踴勢安靜無煩爲衆忍住習近
善友專行法事執御權化施備忍行樂於檢
戒諄想已無滅斷僞佞言行相應志存返復

常有媿色內自慙耻已調忍怡悅根行至信意而制御行持功德志遠小道樂弘大乘行觀一切三寶之事使其不斷斯謂龍王三十二法菩薩應此逮普智心又復龍王有十六事進增普智顯力弘執何謂十六進普智耶施行衆濟具戒無缺忍應調忍果上精進致定五諸行已具智慧信行悉足供事如來遊靜樂閑備六堅法有最七善飾身口意德具操行知足樂靜身三勸彼修勝定觀諸德得備是謂十六行法之事應相祥福演大智心顯持

佛世流化自由又復龍王其普智心以二十二事而除邪徑以其所乘志修普智何謂十二事行過聲聞緣一覺意已下貢高無我自大消去諂事抑俗雜言遠棄非戒拔恚怒根挽却魔事除去蔽礙不章師訓耗滅罪除省已切惻不論彼非習離惡友遠逆良善去非六度又逝貪惜戒無不淨已棄諍訟而離懈怠於迷自正捨諸無知斷去無便却去惡行是謂菩薩普智釋除二十二邪軌速應權慧永無懈怠又復龍王二十二踊事進順隨

行得普智心而不可當諸魔波旬及魔官屬
并與外道降而却之何謂二十二踊過戒事
踊過於定亦踊過智而過慧行踊過權化亦
過大慈踊過大悲以要言之過空相願我人
壽命過離衆見及發因緣過心自淨承覺神
聖過於識念應不應見過大金剛堅固之行
是謂龍王菩薩所行二十二踊法致普智心
一切衆魔及諸魔身并邪外道不得自在無
敢當者悉降却之又復龍王其普智心依二
行處致普智心何謂爲二如其所言修應行

處諸功德本觀道行處是謂二事普智行處
復有二事其普智心而不可毀何謂二事在
於衆生無增異心於諸殃行濟以大悲是謂
二事普智無毀又復龍王其普智心有二重
法而無過者生死之黨及衆聲聞并諸緣覺
無能勝踰何謂爲二執權方便六深行智慧是
爲二事普智重法又有二事休普智心何謂
爲二處事無疑滯結之心在在不安樂俗欲
諸樂是謂二事休普智心復有二事護普智
心何謂爲二不志聲聞緣覺行地觀觀大乘

至美之德是謂二事護普智心復有二事妨
普智心何謂爲二志常多倭內性懷諂是即
二事妨普智心復有二事不妨普智何謂爲
二專修直信行于無諂是謂二事不妨普智
又有四事蓋普智心何謂爲四數亂正法於
諸菩薩賢明達士亦不奉敬常無恭恪不覺
魔事是爲四事蓋普智心復有四事於普智
心而無其蓋何謂爲四護持正法謙恭受聽
尊重菩薩視若世尊常覺魔事是爲四事普
智無蓋又有五事致普智心何謂爲五所行

無望於生無漏用戒德故不捨一切以大悲
故憎愛無二身命施故財利周惠供事法故
是爲五事得致普智復有五事進普智心何
謂爲五習善知識不患生死志遠無蓋去非
時心求諸佛智是爲五事進普智心復有五
事在普智心過諸聲聞緣一覺念何謂爲五
過聲聞脫過緣覺脫過衆智心過諸吾我又
過習結是爲五事過諸行法復有五事於普
智心而有其悅何謂爲五悅過惡道悅審普
智悅具覺慧悅戒無厭悅解衆行是爲五事

普智之悅復有五事發普智心得五力助不
溺生死何謂爲五無其怒恨用忍力故能滿
諸願用德力故降己自大以智力故勤習廣
聞用慧力故四衆恐怯無畏力故是爲五事
致諸助力復有五事在普智心得五清淨何
謂爲五離衆穢行淨諸墮者因緣諸根無惑
淨之隨順諸時以觀淨之行治於等權道淨
之一切諸法化轉淨之是爲五事普智清淨
復有五事得普智明何謂爲五明解無欲明
已彼心明於五句明達慧行明眼無礙是爲

五事致普智明復有五事廣普智心何謂爲
五以其五種五根五莖五枝五葉五華五果
何謂爲五種日修志修而淨內性等觀人物
求習脫行弘於權變是爲五種何謂五根以
大慈悲德本無厭勸進衆生使免小乘不忘
餘道是爲五根何謂五莖曉權方便慧度無
極示導人民護持正法等觀喜怒是爲五莖
何謂五枝施度無極戒度無極忍度無極進
度無極定度無極是爲五枝何謂五葉樂進
聞戒求處空靜常志出家心安佛種所遊無

礙是爲五葉何謂五華得文相具積滿德故
衆好繡備種種施故七覺財具心無雜故致
有顯辯不蔽法故深達總持聞無忘故是爲
五華何謂五果昇致戒果已得度果達緣覺
果又得菩薩不退轉果獲佛法果是曰五果
斯謂龍王菩薩然一七五三十五事廣普智樹道
寶行也修應之者得佛不難佛告龍王其有
菩薩欲受持此普智心樹深妙明顯要行句
者當勤加習普智寶樹如是龍王善視一切
諸法功德莫不由斯寶樹與義諸發無上正

眞道意悉皆因是普智寶樹至要句也譬如
龍王選植樹種知此已致樹之根莖枝葉華
菓而甚盛茂也如是龍王其有能受普智心
種斯已得致諸佛賢聖最上慧法三十七品
是故龍王欲入普智所行功德欲轉法輪當
受持此精修讀誦專心習行廣爲一切宣傳
布演如是龍王勤受學此當佛說斯普智心
品法語之時諸龍王衆中七萬二千皆發無
上正眞道意龍王太子及諸姝女萬四千人
悉皆逮得柔順法忍五千菩薩承宿德本悉

得法忍時阿耨達并餘龍王及諸眷屬自乘
神力踊昇虛空興香之雲忽便普布調和美
香及末栴檀微雨如來及衆會上又化奇妙
珠交露蓋徧覆王舍一國境界而悉歡悅於
上歌詠至真如來積祚巍巍聖德無量列住
雲日各現半身光文虛空一切衆會莫不見
者也

清淨道品第二

於是龍王復白佛言甚未曾有唯然世尊乃
若如來博爲衆生說道俗心及普智心行德

所應又惟世尊如來無著平等正覺願演散
說菩薩之行修應清純明賢所由得道清淨
使其終已長久無垢不中有懈無倦弗退至
得十力四無所畏而得具足諸佛之法爾時
世尊告阿耨達善哉龍王勤思念行吾當廣
說菩薩大士清淨道品阿耨達曰甚善世尊
幸蒙受教惟願說之於時聖尊告龍王曰菩
薩行有八直正道當勤受持何謂爲八六度
無極道恩行之道得五通道行四等道及八
正道等衆生道三脫門道入法忍道如此龍

王是爲菩薩八正行道何謂菩薩度無極道
度無極道者諸所布施勸彼普智何則然者
不以無勸施成普智其行勸助於德本者斯
得施度無極名目又及行戒忍進定智亦以
勸助彼普智心乃得慧度無極名目是曰菩
薩度無極道恩行道者舍受衆生何則然者
以彼菩薩演示法度菩薩行恩舍受一切覆
以四恩廣爲說法而使衆生順受戒化是四
恩道神足道者覩諸佛土天眼徹視見衆一
切生者終者又見十方諸佛世尊弟子圍遶

悉見如是於諸佛土以其天眼應當所採而
採受之又其天耳聽諸佛言聞輒受行在於
衆生及諸類人而皆明曉悉了知盡爲隨說
法得識宿命不忘前世所作功德又具神足
遊過無數諸佛國土應以神足當得度者輒
弘神足而度脫之是曰神足應道又何謂爲
四等行道其隨修淨梵志中者并及諸餘色
像天子知彼意行隨順化者斯則慈悲是爲
喜護建立以道使彼應度此謂菩薩四等行
道其八正道普悉行之聲聞所由緣覺依因

大乘亦是謂賢聖八直正道何謂心等諸
衆生道當爲此興不爲是興爲斯可說爲此
不應是有賢德此非福人斯爲盡應此復不
應行等菩薩盡除此意是謂心等諸衆生道
何謂菩薩三脫門道得致以空斷諸妄見以
其無相除衆念想應與不應以其無願永離
三界是謂菩薩三脫門道何謂得致法忍之
道受拜菩薩菩薩自覺行應於忍得爲諸佛
世尊所決授署無上正真道意是謂菩薩不
起忍道菩薩致此八直正道弘化流布權導

無礙時佛說是八正道已二萬四千天龍及
人悉逮應此八道行也若是龍王菩薩以此
八直正道等塗一歸用無等故莫有能與菩
薩比者亦無其侶獨步三界靜一心持修智
慧行應當所得已自果之明達諸法而知本
無斯謂如來是曰龍王八正之道爲彼一切
凡諸若干衆生所行興種種說而此要說等
同一同以無妄說歸未生說也云何於此道
清淨耶曰道無垢用無塵故是道無瑕本無
念故是道無冥慧照明故是道無著本清淨

故道常無生無所滅故道如永無本無有故
道無漏穢三界淨故是道寂然過凡行故道
無可至無有去故道無所來無從來故道恒
無住過諸欲故道無所處過衆見故道無勝
者過諸魔故道大弘覆外道不及故道永離
望自大者故道無所容不修入故是道極遠
用希望故道爲乖難愚夫行故道可果致修
行者故是道夷易樂勤行故道極平坦住正
見故是道無妨修無毀故是道無礙等正行
故是道無垢三毒淨故是道清淨終無著故

是謂菩薩道之清淨若是菩薩於清淨道務
進勤修又應行者彼於法性已悉清淨得淨
我性亦以而過法性淨故則數界淨數性淨
故無數性淨無數淨故得三界淨三界淨故
眼識性淨眼識淨故意識性淨意識淨故得
空性淨空性淨故諸法性淨用是淨故則諸
法等等淨如空空等淨故得衆生淨以諸淨
故便無其二亦不著二無二淨故則道清淨
以斯言之清淨道也彼無衆念亦不念道諸
念悉淨若如泥洹於彼永無是謂無念應無

所念無念道者亦無識念其道都無心意識
行以此言之清淨道也說是清淨道品法時
二萬天人皆得法忍時阿耨達復白佛言云
何世尊菩薩大士修是清淨而應向道聖尊
告曰如是龍王菩薩大士欲行斯清淨道意
者當曉淨行亦使其身口意清淨何謂身淨
己身以空解諸身空身之寂靜解諸身寂身
之已脫解諸身脫身之怠慢解諸身怠身之
如影解諸身影是謂菩薩清淨道也又云身
淨身行無生其有生死觀於無生彼以無生

而等生死則知其身亦曉身行何謂身行去
未生法來無盡法見在量法終無盡法其無
盡者是謂身行又復身法因緣合會其因緣
者則空無相憺然無念若此龍王是像法觀
斯謂身淨又若如來身之無漏不墮三界觀
身無漏如如本無以無漏身不墮三界彼無
漏身能入生死其無漏際無倦捨退以無漏
身示現色身如此現已亦無念滅身之法本
如如來身淨衆生身淨己身亦淨等如本無
是謂菩薩行應清淨何謂口言為應清淨一

切賢愚言皆清淨所以者何用等相故凡夫劣勢著於音聲若信不諦憂喜無常樂於顛倒觀察衆生無本都無淫怒癡欲何則然者以諸字說聲出皆淨無欲恚愚亦無其著以此謂之一切言淨以言言之何者爲言以欲恚癡而爲言耶諸垢爲言乎言者無著不著眼耳鼻口身心所言風像風動聲出因緣合會使有聲耳所言如響賢愚所言皆同如響所可言者不住於內亦不出外於其中間而不可得住本所念及其所行出於言者并所

念想無住無想是謂龍王如來所言及其衆生一切音聲皆空非真損斯法耳曰惟世尊如來所言斯不諦耶曰是龍王如來審諦所以者何如來諦故解知諸法非真非諦又復龍王如來所言隨字音聲皆答衆生一切音聲爾故衆生亦轉法輪而亦不知法之義順以此報應使其行之隨如等滅衆苦之事曉解諸法行了如是衆生音聲已無所信住在諸煩惱而常閑靜現出欲言於著無著聲出所言講論談語其如法者不有違錯是謂菩

薩口言清淨何謂菩薩心爲清淨其心本者不可染汙所以者何心本淨故其所可謂容欲垢蔽菩薩於斯不有所著了解心權於本自淨又其心行不撰德本彼德本者了識心本以此心行慈及衆生識了知彼空無我人其心德本助勸於道知等彼道觀如是者斯謂心淨以此淨心與諸淫恚愚行者俱而永不受欲怒癡垢與操行俱不著諸穢是謂菩薩身三清淨說斯清淨道品法時三萬菩薩速補生處

道無習品第三

又復龍王其菩薩者乘是淨心生於欲界而在形界與諸天俱處衆梵中安詳靜然在中進止無勝動者又斯菩薩能降諸天化導以權或生形界而在欲界現如有家與諸衆生周旋坐起不與有勞弗慢衆生亦無自輕彼以斯淨諸定正受盡自爲定不隨正定而有所生何則然者以彼菩薩執權方便心應淨故若此龍王菩薩曉解清淨行者當修清淨已而習道如是龍王菩薩不習以求道習不

習無習以想道習亦不習於望道之習亦不求習了解道習不習所生冀向道習不習行滅而爲道習亦不求習以爲道習不習無習爲道之習不習執捨以習道習不我人壽不身無常不身性苦不身有我不身夢幻野馬影響亦不身空無相無願不身無欲法行習道以要言旨身性諸情亦不興有十二因緣乃至老死無欲之法不數無數道無二習不俗無俗不漏無漏不犯無犯不二之習以求道習又復諸法無習之習是道無習斯謂道

習不習之習如空無習亦不無習當如此習是道無習無相無願彼不作習亦非無習當作是習無偶不偶諸法無住勤習如是乃應道習當佛世尊說是清淨行無所習道品法時三萬二千年及世人悉皆逮得無所從生十五法樂之忍五萬天人宿不發心於菩薩者皆發無上正真道意七萬菩薩逮得法忍爾時一切同聲而言世尊其有族姓之子及族姓女逮聞說是清淨道品無習法者其值聞已心無驚恐不捨退者皆是受習如來無上正

真道意得轉諸佛所轉法輪又惟世尊是輩
菩薩悉獲無上正真道意爲無量人分布斯
法亦復當坐師子之座當於天上天下人中
極師子吼猶若如今如來之吼悉降魔衆伏
進外道顯樹法旛熾法暉明震雷法鼓已鳴
能降法雨爾時世尊見諸天衆龍神之衆人
與非人又及四輩聞其至說莫不怡懌於是
如來爲阿耨達重復弘演而說頌曰
道非習可得 無乃興習想 其道行如是
棄離習念行 不望求習道 蕩除衆異想

其道都無習	清淨像明月	若有起習想
無處亦不習	已過無習處	得致最上道
道爲無我念	亦不與空習	是道無有二
安快而無上	命壽亦如是	無人及與言
其道不有人	無命亦無住	諸有習道者
而欲住於空	斯去聖路遠	是不應道習
道亦無有空	以捨於有習	如本同一相
永空空於空	道爲無起相	亦不有滅相
不起亦無滅	彼悉爲道習	吾音譬如幻
解想當如此	持想行所習	道當何從生

道爲都過俗	彼不有身習	亦無滅身行
可得致於習	是身根之家	本無所演廣
彼不有餘求	本無不可得	其習是道者
當如如本無	如本知本無	是謂應道習
諸法之本無	所覺若如幻	解行而致此
乃應道之習	若其不至道	所作如不住
無能止其行	佛法不由道	若如所習道
并及與無習	所演爲如此	以住於本無
有限餘道者	劣乘之所依	是者無上道
大乘所因由	諸興此道者	以致而無住

斯則顯行德	可致應道習	道正而無險
端直且平坦	勤親行此道	永離衆邪迹
若如卿龍王	自住其宮室	不動於所處
降雨充大海	大士亦如是	習道如所行
法身而不動	能滿於智海	又如仁龍王
在於大地上	以雨徧充之	其不有身著
菩薩德如斯	行此之所習	用法滿衆生
其內無所著	若如阿耨達	龍王大神變
昇道德如是	感動普十方	衆生墮邪徑
諸隨受著見	其住是道者	將順度無爲

已住於斯道	苦薩果大稱	能降魔波旬
并及邪外行	得道如其如	如道無能動
踊過諸俗法	其行譬蓮華	道心無有愚
是行為住止	千數諸衆生	化度立以道
以常住斯道	得致於五旬	神足諸感動
為衆廣說法	諸事悉清淨	身口及與意
當願賢聖道	人性不可議	忍行為無著
其往所可至	斯得如來處	示導諸衆生
生死於至歸	斯處則如來	其往似若至
此為無所至	衆生所可至	當念彼上處

學最佛之道	遊樂以幻法	其作是習道
如道之所習	彼衆德儀行	諸佛所稱歎
其德無有邊	終不可極盡	如此習道者
不習亦無住	彼處不咎魔	衆都不著行
其順此道者	不起亦無滅	已得意志行
總持弘大辯	施惠及戒忍	遂增進若海
身口穢以無	心潔乃清淨	垢消永無瑕
修應此道者	得昇於智達	所行習深妙
難動慧無即	守習是道者	其諸最正覺
過去與當來	現在亦如是	致道世所歸

彼已離衆難 值世遭難遇 永爲諸佛子
其聞此法者 快哉諸衆生 至善聞斯法
眞應奉如來 其樂是經者 有曉此道習
能斷諸情態 紹德具衆相 得應三界將
三昧弘道廣顯定意經卷第一

音釋

協胡頰切 恪苦各切 恍恍呼廣切 惚惚不呼
服也 怡怡戈支切 懌懌也 怱怱切 憤憤古對
也 怡怡也 懌懌也 怱怱也 憤憤也

三昧弘道廣顯定意經卷第二

絲二

西晉三藏法師竺法護譯

請如來品第四

時阿耨達自與其衆諸眷屬俱稽首世尊跪
膝叉手而白佛言願請天尊迴屈神光往詣
無熱之大池中盡其三月吾等志樂供養聖
尊并諸神通果辦菩薩及上弟子蒙愍納許
願受其請所以然者吾等供事至真正覺豈
能應於如來儀耶冀蒙逮聞寂靜上化惟以
此法應供養也思願重聞如是像法令常歡

悅此乃應奉於三寶耳爾時世尊不受其請
重啓二月如來不然垂聽一月天尊不可願
納半月世尊默然而已受之於是龍王自與
其衆諸將從俱見尊受請忻喜悅懌善心遂
生遶佛三匝興雲震雷而降微雨普徧天下
忽然之頃還昇宮中時阿耨達到坐正殿尋
輒召諸五百長子其名善牙善施善意善明
能滅寂根感動大威甘威甘權甘德普稱威
勇持密忍力行祥如是比等五百長子宿樹
無上正真道已王告之曰又諸子等吾今已

請如來無著平等正覺及衆菩薩諸弟子俱盡其半月世尊正覺垂大慈哀興於弘愍而尋受請汝等當共同一其心廣相勉勵加敬世尊至真如來勤念無常當各寂靜謙恪恭肅住持如來宜應棄捐婬心欲意及龍戲樂除貪怒害離欲色聲香味細滑所以者何世尊無欲而且詳安仁雅審諦順調寂靜顯備諸德侍從圍衛儀容無量皆承諸佛真正要戒以是之故汝等半月無得入宮當除婬恚愚癡之念又復如來宣講法故必有他方神

通菩薩釋梵持世宿淨天子當昔來會汝等勤念廣施殊妙光顯嚴飾慎勿中懈令諸會衆觀變踊躍此乃真應供養如來時阿耨達都約勅訖輒爲如來於雪山下無熱池中爲世尊故化其無瑕淨瑠璃座而使縱廣七百然二由旬乃殊異妙周匝列置八萬四千雜寶奇樹校以衆珍諸寶鮮飾蔚有光華精耀百色中出美香諸樹間化八萬四千七寶之堂衆珍光彩極好無雙施置十萬交露綺帳乃垂異妙赤真珠寶貫在諸堂上有師子座八萬

四千皆大高廣而布無價妙好雜氎牀座寶
分施諸交露校以衆寶所在堂上有龍姝女
各二千人其色姝妙姿美無量顏像萼華口
出熏香擎持雜華末香塗香調作諸伎以詠
佛德興悅衆會於上虛空化大寶蓋周千由
旬徧覆會上奇珍綵鏤其實蓋中衆色無數
懸好繒幡於幡綵間垂諸寶鈴景風和降音
踰諸樂施饌百味備辦都訖爲此變已與其
眷屬恭檢叉手向佛跪膝而遥啓尊以其請
意歎詠頌曰

慧藏智富積辯德 慧達無著明導衆
慧弘普至不有礙 慧上最力降神光
慧解心行惟大仁 當觀十方衆生類
最上神尊受吾請 念啓慈愍惟時屈
知足無貪而易養 祥福審諦聖導師
善行質信知衆意 時節已至可屈尊
其德普稱行等王 造無請友興普念
至仁清淨喻若空 所設辯訖枉神尊
威御十方猛持世 佛事十八而等有
度衆最首悲踊行 願與其衆時蒙至

色妙端正相彩身 奇好種種華繡文
志樂歡悅惠法施 大仁上導願察時
梵聲清淨若雷震 鸞鳳哀鳴師子步
妙音具足悅諸士 衆心忻望願時顧
佛土三千無等倫 弗有能知如來心
聖尊明觀衆生行 所修常應時降此
知時普應懷權化 了達衆生有聖誓
詳審之行目明好 威神檢足願迴光
衆生甚多普渴仰 十力持勢威無慢
大仁德峻勇而果 聖性爾枉昇遊此

慙祥備足德最上 寧救濟有徧無極
師友無雙協懷衆 化龍億百興有悲
於世威猛普慈救 達知衆行應如意
開布散示惟天尊 輕舉神足願時至
爾時世尊知阿耨達請時已到告諸比丘著
衣持器差應留守無熱龍王遙跪啓時應受
半月宜便即就於時八萬四千菩薩皆大神
通德具果辦弟子二千亦上神足侍繞世尊
周帀而導至真如來從鷲山頂忽昇虛空神
力而進如其色像身放無數百千之光徧照

三千大千境界普悉晃明諸欲色天皆見世尊揚光無數飛過虛空自相謂言神尊致彼無熱王所將興法化演興無極乃使如來爲衆園遶即彼半月多諸天數百千衆得見世尊又聞說法緣復觀覩無熱所設莊嚴感變而令世尊故遊到彼時諸天子各各發念供養如來或願散華或兩名香或施天樂以歌佛德或復懸幢幡蓋繒綵率隨如來世尊身光神照熒熒明踰日月星宿淨色及諸天光佛之聖威神耀無量根定寂靜行遊祥安

釋梵四天威變種種奉敬追侍隨從如來於時聖尊到雪山下住止右面便告賢者大目連言汝到無熱王所處宮當宣告之如來已至時可應入於是賢者大目犍連承佛神旨忽遷無熱大池之中現於虛空去地七丈化身像若金翅鳥王住阿耨達龍王宮上便告王言如來至也彼諸龍衆及姝女等無不愕然驚恐怖悸衣毛爲豎四走藏竄展轉相謂此池自初無金翅鳥斯從何來時阿耨達告諸宮人太子眷屬而慰之曰且各安心勿恐

勿怖此爲賢者大目連耳承如來使興神足
變賢者目連到彼告訖還詣世尊時阿耨達
便與其衆諸子臣民夫人姝女舉宮大小俱
而圍遶各奉名華及美末香并衆塗香幢蓋
繒幡倡妓種種調作相應進迎正覺于時世
尊爲諸菩薩及衆弟子天龍尊神所共圍遶
俱而前至無熱所設廣博道場如來到已尋
就高顯師子之座菩薩相次然後弟子諸衆
坐訖爾時龍王觀視世尊及諸菩薩弟子衆
會坐悉而定興心無量內懷怡悅輒與其衆

手執斟酌所設饌具踰世甘肥延有天味肴
膳百種以用供佛菩薩弟子并諸衆會使皆
充足世尊菩薩及諸弟子飯畢輒各洗盥應
器察衆都訖時阿耨達即啓如來願聞說法
於是世尊日晡時後便從定起端坐說法諸
來會衆滿千由旬從地至上中無空缺天龍
鬼神及人非人周匝圍遶至真正覺一切會
者各懷踊躍
無欲行品第五
爾時龍王悅顏進前跪重白佛惟願世尊爲

斯衆會如應說法令諸一切免離生死永除
想著五陰諸苦穢垢昧昧勞塵之行使其永
無三毒意結蒙及諸龍衆得棄邪冥伏其心
意弘致至善使有悅豫深行菩薩後若如來
現有存亡當使吾等所在國邑護持正法於
是世尊讚龍王曰善哉善哉阿耨達王諦聽
其義勤思念之以宣布示吾當廣說令此會
衆多免罪痛根枝雜想意識志疑使解普智
昇遊三界時龍王言善哉世尊願樂廣說當
頂受行是時聖尊告龍王曰有一法行菩薩

應者爲天世人甚所敬重何謂爲一志修深
法以行無欲何曰深法行無欲手如是龍王
菩薩依順因緣之無離二見際知有無者斯
見諸法依著因緣不見有法不由緣生彼作
此念其依因緣斯無依緣彼不依魔其依緣
者彼不言吾亦不言我又其依緣中無我我
所依緣無主亦無執守其依順緣了解起生
速易得致四依之念何謂爲四依於至義而
不文飾依於慧行不爲識念依順義經不依
攀緣依念於法而不爲人彼何謂義何等爲

慧云何順義何謂念法義謂空義不受妄見
無相之義不著念識無願之義不著三界無
數之義不著於數又復義者於法非法而無
其二音聲無得念想無念法處無住用無人
故壽命言聲爲無所有又復爲義其法義者
爲無欲義何謂菩薩爲法義者其無眼色耳
聲鼻舌味身更心法之義不生色義不滅
色義不爲痛想行識之義亦不生滅識行之
義亦不欲色無色之義亦不生滅欲色無色
之義亦不我義亦無我見著入之義不有入

義亦不著入見入之義亦不著入有佛身義
亦不法字著入之義不數計會有著入義亦
復不有施戒忍進定智著義曉入一切諸法
之義是謂菩薩爲法義也其從是義而不有
退是謂爲義彼何謂慧日光無生慧習無念
慧盡都盡慧道無去慧於陰幻法諸性法性
而無毀慧在於諸情空聚爲慧解入諸法明
了衆生根滿具慧至念無忘於諸止意不意
無念於諸斷意等善不善於其神足身心建
慧又於諸根了輕重慧於諸覺意覺諸法慧

然二

七

而於諸力已降調慧道爲無數於滅寂慧觀
別法慧始不生慧來不至慧中無住慧於身
像慧言以響慧心法幻慧是謂菩薩明達智
慧又何謂爲順導義經從是因緣而起然者
滅於愚癡滅於老死無我而然於無我人及
與命壽深解諸物若如來我皆非真法而然
於三脫之門也等於三世求三無著所謂諸
法見都無生觀了知者而得等滅離俗情態
菩薩來智慧度無極於諸意念而無疑惑應
入是行斯謂順義無所去至亦無從來泥洹

無爲不有去至是謂順義何謂如法若諸如
來興與不興法身常住是謂如來如如本無
而無增減不二無二眞際法性謂之如法不
毀行報無行報法斯謂如法大乘者由六度
無極緣一覺乘從因緣脫聲聞之乘依音聲
脫是謂如法施致大福戒得生天博聞多智
定念致脫斯謂如法從行不修興有生死行
之純至而立無爲如法之謂愚以欲力智則
慧力斯謂如法其一切法悉依法性如此龍
王其依因緣而起生者斯則應得四依之念

其依因緣彼則不依斷著有無是謂其見因緣起者斯見諸法其見法者斯見如來所以者何因緣乎龍王等起無起於法非法等而無著又如來者亦為無著因緣之起亦無有起法不可得覺其法者斯則如來於因緣起慧眼見之慧眼見者斯則諸法見諸法者斯則如來是謂其見因緣起者斯則見法其見法者斯見如來又如來者以法見法如是龍王若以此法行應脫者斯謂菩薩而無欲行乎又龍王無欲菩薩不作欲習悅樂賢聖捨

非賢聖勤慕興護於賢聖種廣合諸慧為法作護修於博聞志樹無忘不捨戒身智身無傾定身不動於其慧身得善堅住脫慧見身強固難轉脫慧見故又復龍王無欲菩薩得無數佛正法度義亦具無數諸佛要慧又果無盡諸佛之辯得通無量諸佛神足因致無數諸佛權解普入無量衆生之行遊過無數諸佛國土因見無數百千如來緣得聽聞無數諸法得無數義達無數慧曉無數行度無數衆若是龍王無欲菩薩常應清淨消盡衆

穢德不可量三界自由不有所著何則然者
以其無欲自從心生有三事從心出生何謂
爲三從其欲生又從愛生亦由起生復有三
生觀於起生又觀起生又觀所行觀心無處
又復三生滅寂專一曉解於觀如法隨行又
復三生德備仁調以爲靜寂從行勤生又復
三事從於行直而無有諂仁慈調忍復有三
事無沉吟疑順善不麤忘足易養又復三事
從其空生又復無相亦曰無願又復三事心
之所生諸法無常從其心生諸法皆苦亦由

心生諸法無我亦從心生復有三事而從心
生諸法無常諸法無我滅盡無爲皆從心生
如其龍王菩薩等滅亦由心生謂其不捨普
智心行平等一切以大慈故不捨衆生大悲
心故不厭生死用大喜故等離喜怒以大護
故所有惠施不望報故衆戒學行德義備故
內尅己過不論彼短能忍衆生諸不善行欲
度彼人心固金剛合集衆善諸德之本身命
無惜得致一切諸定正受心無勞倦不以正
受而有所生曉智以權順隨衆生以其諦慧

度諸志脫欲達聲聞緣覺乘者顯念佛法求諸佛法能忍衆苦廣宣法故衆利敬養蔑而棄之志具諸相德行無厭充滿智慧博勤多聞習善友故值善知識用謙敬故得應謙行降自大故以降自大志行備故具滿意行用無諂故以離諂者言行應故以其無欺修誠信故以住信言離衆欺故滅除妄語生誠信故降心於信如是龍王其有菩薩而生是心斯謂無欲又復龍王無欲菩薩魔不能得其限便也所以者何以彼菩薩應無限故而亦

不行有限之法彼何謂爲是限法乎欲婬恚癡斯皆有限菩薩於是不有所著以此謂之爲無限也聲聞緣覺其乘有限菩薩住於普智心者魔終不能得其限便有念無念念想有限菩薩以離衆念之應如此菩薩魔不能得其限便也如是龍王有二魔事而是菩薩無二當深覺之亦當遠離何謂二事於其師友無恪敬心而自處大貢高憊人是謂爲二又二魔事捨菩薩六度無極藏心反喜樂雜行聲聞及緣覺法復有二事何等爲二無其智慧

而欲行權與諸墮著妄見衆生樂相狎習復
有二事寡聞小智自以慧達雖有通博於中
自大又復二事於德甚少望生尊貴若修德
行而樂小乘復有二事正法不護不度衆生
復有二事志不樂習於諸菩薩及衆通達明
智者俱專行誹謗清高菩薩主爲法師數興
蔽礙又障師訓而多諛諂又二魔事捨諸德
本心存不德復有二事雖在閑居懷想三毒
志常憤丙若遊國邑有貪利心復有二事爲
非其人說深要法應當爲說而反不說復有

二事不覺魔事遠離普智意數錯亂如是龍
王其諸魔事色像若斯無欲菩薩而永無此
又復龍王若有菩薩修於清淨行應無欲當
致菩薩十六大力以此諸力降調已志以化
衆生何謂菩薩十六力耶曰得志力意力行
然二
力慙力強力持力慧力德力辯力色力身力
財力心力神力弘法之力伏諸魔力無欲菩
薩得是菩薩十六大力何謂菩薩爲志力耶
如是龍王菩薩志力能覽諸佛一切所說總
而持之是謂志力斯菩薩意應諸佛行於諸

衆生而無斷礙是謂意力能達一切音聲所說解了諸義是謂行力離諸罪行興衆德法是則慙力一切諸難不爲非行斯則強力億千魔兵不敢而當是則智力通達持法宣示等學而無遺忘斯則持力無著不忘於百千劫其所可說無礙不斷隨解諸法是則辯力若諸釋梵及四天王往詣菩薩黯然無色是端正力以其寶首所可念願應意即至是則財力過諸外道在中獨尊是則身力衆生之心能一其心知衆生心順行化之是則心力

衆生應以神足度者爲現神變使衆觀見是神足力若所說法使衆聞之而無中斷彼受順行等除苦盡是弘法力若其禪定正受之時得承佛旨賢聖行法是降魔力斯謂菩薩十六大力其有行者志慕願此十六之力而欲得者當修無欲譬如龍王一切流河歸於大海道法諸行三十七品悉歸無欲又若龍王諸藥草木依因於地諸善行法皆由無欲譬如龍王轉輪聖王衆生所樂若此其有無欲菩薩乃爲諸天龍鬼世間人之所愛樂也

爾時世尊為阿耨達并諸太子而說頌曰

欲為慧菩薩 志願佛道者 彼當離穢法

常勤行無欲 慧解因緣法 不倚於見際

觀法以因緣 無緣不有法 緣生彼無生

是不與自然 著緣斯亦空 知空彼無欲

著緣而無相 脫願寂復寂 憺怕像大愚

其處魔不審 見法無著緣 於其無吾我

彼不有我人 知是則無欲 無主不守護

不獲亦弗捨 本脫無取捨 離欲常了法

觀義不為飾 慧行常脫識 曉了順義經

依法不為人 空義是佛法 及脫無相願

不倚造見念 是義其無欲 於法不有二

音聲無可得 處法難可動 不入義無欲

法義無欲義 眼耳不色聽 鼻口離香味

身心無更法 不色生滅義 又不離痛想

亦無識住義 達是應法義 不住三界義

亦無吾我義 世尊無色身 無字法說義

計數非法義 至要不以施 非戒忍進定

慧無我世尊 諸法解無義 智謂是法要

於義永非義 無欲則佛法 無生曉若慧

不起無有滅	不生亦不終	知是應尊習
五陰解若幻	知其如法性	曉內如空聚
了是為無欲	知法至趣向	明達衆生情
斷念以止意	無欲得是慧	意斷無有二
神足心輕騰	以力而無慢	諸根知止足
覺定解以智	明了八直道	慧觀於滅行
解法所至歸	本法不有生	當來而未至
現在無住法	不欲知如是	身像無堅固
語空譬如響	心幻若如風	無欲解如是
知說順義經	了達於因緣	本癡生死滅

無欲是慧義	無我人命壽	解了法非法
以脫於三門	所說空無著	無生見滅道
習慧喻俗行	不從心意生	無欲覺是行
法性常如住	佛興及滅度	無二覺不覺
無欲知是法	其積如本際	彼積悉諸法
空積及人際	無欲達是智	法性常以住
覺起而滅度	不識知其二	無欲法如是
不殃善不善	知法無罪報	佛法不從他
從行度無極	以離因緣聲	音脫聲聞行
惠施致大富	彼見戒生天	博聞得智慧

守意化衆生	至聖都守意	無欲法如是
力常轉諸欲	智慧志存法	等念是諸法
法性常無得	識知因緣起	而致四德行
知義及與法	順義知無欲	觀緣彼見法
以法見世尊	等於起滅法	無欲了尊法
因緣跡無得	音聲法無字	斯法得本無
是聖謂如來	以慧見因緣	無見不見法
明慧了因緣	是謂見世尊	彼永無欲行
悅情諸賢聖	法性毀不捨	而護賢聖種
常護佛正法	無欲聞不忘	戒根不捨離

於定達難動	知身慧不動	常住於脫身
及脫慧所見	無欲常安住	解入諸佛法
無量衆聖道	得佛神足具	辯達一切行
知衆情意行	忽然遊諸土	得見諸如來
受彼所說法	聞守解達義	宣示無量人
知彼億數行	志得向無數	無欲當自在
降心入功德	伏意使無欲	終不遷是世
諸陰心已脫	了知起滅處	觀滅無所有
所習以而無	聲性心所行	不諂常端直
無佞調仁善	無欲德如斯	以脫空相願

卷二

十四

解苦知生死	無我法常寂	無欲從心行
普智心等慈	以悲濟衆生	喜不厭生死
行護無有邊	所施無望報	省己立諸行
忍耐善不善	念脫彼衆生	勤精強修德
不計有身命	以次知諸定	亦不隨於定
慧定大精進	於數不墮數	以諦化聲聞
智不志滅度	無欲值佛世	彼有斯諸法
魔不知其行	安住法了是	無欲不有限
曉是貪垢限	離欲彼無想	魔不知其處
其想吾我應	彼自起魔事	是悉度諸行

衆魔而不審	無欲志不忘	所行常清淨
無欲不意志	慙行而不毀	以聞無欲者
悅慧敬如來	其住如法住	彼應如世尊
諸佛十力者	菩薩欲奉事	聞斯無欲行
勤意當受持	其聞此無欲	悅信廣奉行
彼常致無欲	得佛是不久	無欲聖所由
而致最清淨	無欲得成佛	以化無有邊
去來現在佛	諸得衆相好	悉從斯無欲
及行是法故		
爾時世尊說是無欲法品之時諸在會者四		

卷二

十五

萬二千天龍鬼神人與非人皆發無上正真
 道意萬二千人得不起忍又八千人逮柔順
 忍三萬二千天人神龍得離塵垢悉生法眼
 又八千人而離欲行八千比丘漏盡無餘當
 爾之時三千大千世界六返震動普徧十方
 晃然大明於雪山下無熱池中周帀現有所
 未見聞光耀妙華皆至於膝其池中普生
 乃異鮮飾蓮華大如車輪中生出美香華色
 無數百千諸種皆是佛之威神所致亦為是
 法興其供養以悅無熱龍王意故

三昧弘道廣顯定意經卷第二

音釋

蔚切於貴於勿二妹春朱切荇芳無切晃胡
切耀煒日于盛貌切愕五各切悖其季切懺莫
切輕丙奴教切與與同

永樂北藏

三昧弘道廣顯定意經

第五一冊

三昧弘道廣顯定意經卷第三

絲二

西晉三藏法師竺法護譯

信值法品第六

爾時阿耨達龍王心甚悅豫又及龍王五百
太子宿發無上正真道意聞佛說是尋即皆
得柔順法忍忻心無量各樂供養輒為如來
施飾寶蓋進上世尊同時白佛言聖師如來
至真正覺為吾等故出現生世何則然者今
吾等聞普信道品得聞是已意而無倦不有
懈退亦無驚恐聞已加重專心習行樂聽無

厭如是像法也又惟如來解說菩薩云何得
值諸佛世尊如來告曰諸賢者等勤念受聽
吾當廣說諸太子言惟思樂聞彼諸上士受
世尊教如來告曰樹信賢者興值有佛何謂
為信信謂正士修諸明法奉之為先何謂明
法日依行應不離德本習求樂賢慕隨聖眾
勤心樹信志無勞疲思僥聞法拔棄陰蓋順
習於道得法利養以施周惠戒與不戒濟接
等與在諸恚怒而常有悅勤樂普智心無懈
退信佛不休未曾亂法悅心聖眾志道難動

喜樂正真而離貢高於衆自早常有等心諸
處無著終捨身命不造惡行修立質信言行
相應等過於著心無垢穢身口意行順隨聖
化明了諸事得爲清淨知足無貪所行應淨
曉入智幻習求慧根依順七財修念誠信根
力已備而行正見所受師友謙恪禮敬安足
易養數詣法會心無退厭有患生死示無爲
德勤心精進求昇晉智以弘道化於如來法
志樂出家修諸無數梵清淨行造立慈悲救
彼衆生志在返復其有報恩及不報者等接

護之心無適莫不自念利常悅彼供忍調之
行已悉備足自見無惡不背說人內情已寂
志於閑居心常樂靜專念習法而無諍訟等
已彼過求備戒具集合定行勤謹於道斯謂
賢者行應俗信樹信如是此謂興值佛世者
也又賢者等其於世俗造信無忘是謂興信
值佛世也又賢者等何謂俗信其有信者信
諸法空以離妄見信知諸法以爲無相而離
念應信知諸法悉皆無願不有去來信知諸
法無識無念靜身口意寂無有識信知諸法

卷三

二

以爲離欲無我人壽命信知諸法信知本無
云來自然信知諸法眞際無跡如本無跡信
知諸法已皆自然等若空跡信知諸法而依
法性信知諸法等過三世信知諸法欲處邪
見而皆悉盡信法無著以離本癡本無清淨
信知諸法心常清淨亦不興起客欲之垢信
知諸法無所觀見信諸法護等斷衆行信法
無我以過喜怒信諸法無心無形像而不可
獲信諸法僞如握空拳誘調小兒信法無欺
不有上下無所捨置信諸法虛若芭蕉樹信

法自由如常寂靜信法無罣不住三處信法
永無不有所生信法若空以等無數信知諸
法若如泥洹常自寂靜如是賢者其於世俗
興起是信斯謂造信而值佛法又復賢者其
有信值佛法名者此則名曰諸法都無起之
然三
謂也所以者何不色生故不色無生化轉之
習不痛想行識無識起不以眼耳鼻口身意
無起轉習不身起轉不癡有無不生老死有
無起故如值佛世不起有生亦不起滅又復
無起習於無滅不以正意無志意習而值佛

永樂北藏

三昧弘道廣顯定意經

第五一冊

世總要言之亦不以三十七道品法習無起
習亦不以道無生之習不以起慧亦不滅慧
不慧無慧無二之習而值佛世當說信值佛
世品時無熱龍王五百太子皆悉逮得柔順
法忍於是世尊復說頌曰

興信值佛世	而習於不生	其無向信者
斯不值佛世	修信謂最上	從致清淨法
行質有報應	不違厥所修	信習諸賢聖
勤修常禮敬	心不有懈怠	此信之所行
勤行聽說法	陰蓋不能動	從信得致道

行逮於柔順	以法所得財	轉惠普周濟
護戒與毀戒	行信而等施	能悅諸恚怒
道心不懈倦	勤求大乘法	有信悅向衆
永離大貢高	志常自卑下	所在無所著
立信相如是	志信不惜身	終不造惡行
守善無妄語	言行常相應	悅信以過界
樂行於無心	身口意清淨	習隨聖所護
有信行內淨	常為慧所將	知身之要本
求問宣所聞	等念於七財	得力根以足
長離衆邪見	志常習等行	禮恪有悅心

敬事其如師	心肅善虔恭	知足無所遺
其心常無念	所志惟道法	有厭生死者
引示無爲德	脫之所當行	惟常求悅心
速離於是世	修梵行無倦	懷受諸衆生
救彼無利望	當報所受恩	悅信當勤求
已利不以悅	亦不嫉彼供	仁忍而悉備
無諂調質直	行信目所見	不背說人短
根寂性安敏	志悅樂閑居	其心無憤鬧
自勵備恩行	先順不有諍	內省尅己過
勤求具戒行	專習於定道	悅信慕樂行

信者相如是	其過俗信者	彼行而解此
與法不有諍	深妙佛所說	誠信信於空
彼都無衆見	諸法無有相	不意離衆念
當斷除諸願	覺了去來事	法永無著作
不有於身心	信爲無欲法	離我人壽命
信者解本無	得至不二處	其本無有積
體無若虛空	諸法信亦然	便與法性同
等過於三世	諸法無有漏	欲處及與貪
樂信無受見	諸法不有著	其本明清淨
客欲無能救	不處心有住	諸法不可見

因緣而無起	常觀於高行	不受所住短
無合不有離	脫者無合同	信悅於空法
愚之所可惑	憺怕意無起	欺偽如芭蕉
口言而自然	無去亦無有	諸法無所有
所見皆不要	其法若虛空	等緣無有數
諸法如泥洹	本無不可見	信悅而行此
解了身虛空	其有如是信	菩薩及凡人
彼則值奉佛	所處無有惡	不以造色行
得應值佛世	無色不有處	不來亦不去
於色無有生	不滅亦無住	當來無所至

值佛廣演說	五陰亦如是	化習轉無生
值佛當散說	慧達諸菩薩	其身及諸情
亦習以無生	佛興以無生	常救諸墮生
癡本無有生	生死亦如斯	是緣如本無
從法而有佛	無起不有生	不滅無有住
是以知無處	處亦不可見	斯亦不自生
興佛而博演	無志不有住	是亦佛所轉
諸種亦如是	佛種順如法	斯類亦起無
如佛而等興	其行如是者	佛興為若此
悅信斯大衆	其限不可得	

轉法輪品第七

爾時世尊告太子等又諸賢者何謂菩薩得轉法輪其有布露如是像法樂說句義受持不忘修而行之諸有不發大悲意者爲興普智隨順衆願而爲說之廣宣布示志不有倦忽棄利養勸念順時又持護行斯謂菩薩應轉法輪又若如來所轉法輪而其法輪行像入德當粗剖說不以起法亦不滅法不以凡夫下劣行法亦復不以賢聖法故而轉法輪又其法輪不中斷絕等斷善惡彼以是故爲

無斷輪又其法輪因緣之起不起無起而有其轉以斯之故爲無起輪又其法輪不以眼色耳聲鼻舌舌味身更心法諸情轉隨有轉以此之故彼無二輪若有二者則非法輪又其法輪亦不過去當來現在所著而轉是無著輪又其法輪不我見轉非人命壽所住而轉是爲空輪又其法輪不識行相滅念之轉是無相輪又其法輪不於欲界形無形界所望而轉是無願輪又其法輪不計衆生有異而轉不處二法是凡人法是聖戒法是聲聞

法是緣覺法是菩薩法是爲佛法彼以是故
爲無異輪又其法輪不以有住法輪而轉以
斯之故爲無住轉法輪名乎諸賢者等真諦
正輪常無毀故要義之輪等三世故無處之
輪諸習見處以等過故寂寞靜輪身心無著
不可見輪意識離故無隙之輪五道不處故
審諦之輪無諦現故行信之輪等化衆生用
無欺故不可盡輪字無字故法性之輪以其
諸法依法性故本積諦輪本無積故本無之
輪如本無故無所造輪無念漏故無數之輪

導至聖故如空之輪明見內故無相之輪無
外念故無願之輪無內外故不可得輪修過
度故又諸賢者其如來者以此法輪轉之衆
生諸意行也其轉不轉彼不可得法無所捨
於時世尊說是轉法輪品之時然三天龍鬼神及
諸種神欣心踊躍顯光讚揚如來七斯法皆同
聲曰善哉世尊甚爲難值如來示說轉此法
輪聞者奉行則應法輪是法名轉空虛之輪
諸已過佛及與當來并諸現在悉由是法其
有信者斯則已度諸行此法吾等世尊代其

勸助彼諸衆生其興是心常欲聞斯法輪品者聞當發求是道要行彼亦不久得轉法輪於是衆中聞是說者有萬天子皆發無上正真道意五千菩薩逮得法忍於是世尊告諸賢曰又正士等其護正法受持正法營護正法是謂護法所以者何於永無滅應是行者天及世人終不能當於時無憂前白佛言又惟世尊若斯正士以如是法而得最覺於其本無不有惑者又如像諸正士等當共擁護所以護者令諸正士使其速應於此大乘

彼皆行已得轉法輪又能興識法之大明是故世尊以斯等教要法正護使發大乘以護法師安救敬禮順聽禁戒是時世尊讚歎無憂龍王子曰善哉善哉無憂正士諸發大乘爲法師故安救擁護是謂護法爲諸法師營護正法護持正法又復無憂護正法者得十功德何謂爲十無其自大降下貢高又行恭敬亦無諂行勤思樂法志慕習法專意隨法行觀於法樂宣說法樂修行法隨所至乘順而說之是爲十行以護正法又復無憂有十

事行得護正法何謂爲十若族姓子及於族
姓女所聞法師遙禮其處思樂得奉來輒敬
愛供給所欲衣被飲食護以諸事往詣謙敬
順聽所說以宣同學障其說非常樂稱歎使
譽流布是爲十事得護正法又復無憂有四
施行得護正法何謂爲四筆墨素施給與法
師衣被飯食牀卧醫藥供養衆所若從法師
聞所說法以無諂心而讚善之所聞受持廣
爲人說是爲四施得持正法又復無憂有四
精進得持正法何謂爲四求法精進勤廣說

法敬禮法師若毀法人正法降之亦以精進
是四精進得持正法時阿耨達五百太子聞
佛說是悅懌忻喜歡樂無量同聲言曰如來
所說甚善無比解諸狐疑各以宮室及其官
屬盡以上佛奉給所應以敬順心而重言曰
從今世尊當勤受化永常無倦至於如來無
爲之後佛之所說是像寶法當共敬受是經
要品求索通達勸進修行斯則世尊吾等至
願又若如來無爲之後吾等聖尊在所國邑
當共同心供養舍利護奉禮敬至於現滅也

於是賢者耆年迦葉謂諸太子又賢目等如
仁輩言獨欲全完供養如來神身舍利汝等
是言多斷衆生諸德之本障蔽明淨翳道至
化使興是言何則然者又若如來本始造願
使留舍利布如芥子爲諸衆生降大悲故何
得全完而獨供養耶彼正士等九即答賢者大
迦葉曰唯然迦葉勿以聲聞所有智限而限
如來深邃無極明達之慧所以者何若如來
者有普智心一切之見處以神足感動變化
若其興念能使三千大千世界天龍鬼神各

於宮殿普令全完安置舍利使各念言吾獨
供養如來舍利其餘者不又復迦葉若如世
尊無爲之後隨衆生心應置舍利又復迦葉
若如來德至於阿迦膩吒天上立置舍利其
如芥子能普明照一天地內是佛世尊神威
變化感動力也

決諸疑難品第八

爾時賢者須菩提曰諸族姓子又如來者爲
滅度耶曰須菩提於起生處當有其滅須菩
提曰諸族姓子如來有生乎曰如來者如其

本無無生而生須菩提曰如如本無無生不生彼都無生也答曰是者須菩提則佛所生如其本無而不有生須菩提曰佛生如是滅復云何答曰亦復如是如本無生於無生無爲滅度亦爾本無惟須菩提不起而生滅度亦爾如是其滅亦爾本無也說是語時無熱淵池現大蓮華若如車輪莖有無量種種之色以名衆寶而用光飾於諸華間有大蓮華色最暉明現奇異好特獨踊高賢者阿難在於無熱大池之中覩其變化所見若斯尋啓

世尊今此變化爲何瑞應興其感動乃如此耶如來告曰且忍阿難自當見之說適未久忽從下方乃於寶英如來佛土寶飾世界六萬菩薩與輦首俱忽然踊出還能仁界升於無熱大池之中各現妙大蓮華座上輦首童子即就蓮華高廣顯座是時衆會皆悉見之愕然而驚時阿耨達及諸菩薩釋梵持世來會諸衆悉各叉手稽首敬禮輦首童子退住虛空共持珠寶交露之蓋時輦首與諸菩薩俱并蓮華座亦踊虛空去地乃遠於上而雨

未曾所見最妙蓮華供養如來從諸華中有
聲出曰寶英如來問訊世尊起居無量體祚
康強神力安和乎聲復言曰輒首童子與諸
菩薩六萬人俱往詣忍土至於無熱龍王淵
池觀彼感變又志樂聽龍王所問莊飾道品
入法要說爲其世尊廣勸法言使其歡悅於
是輒首及諸菩薩從虛空下悉詣正覺稽首
如來欣心肅敬住世尊前爾時天師告輒首
曰童子來乎爲何至故與諸菩薩俱至此耶
輒首白佛吾等世尊在彼寶英如來佛土寶

飾世界承聞至真能仁如來垂慈十方演說
斯要聞是法故尋從彼土昇遊詣此奉禮天
師緣聞如來所講法也迦葉白佛近如世尊
寶英佛土寶飾世界而諸大士忽至此耶輒
首答曰惟如迦葉坐一定時極其神足飛行
之力盡其壽命於中滅度而猶不能達到彼
土其國境界彌遠乃爾佛告迦葉其土去此
過於六十恒沙佛刹乃至寶英如來佛土曰
其來久如而到此乎答曰久如耆年漏盡意
得解也大迦葉曰甚未曾有唯然輒首是諸

正士神足若斯輒首又曰耆年漏盡意解久如耶答曰如其轉意之頃又曰耆年意已解乎答曰已解輒首復曰其誰縛心如有解乎答曰輒首以心結解非脫有解致慧見也曰惟迦葉其無縛心以何解乎迦葉答曰知心無縛斯則爲解曰惟迦葉以何等心云何知心過去知耶當來現在乎過去者滅盡當來未至現在無住以何等心而知其心曰心已滅者是輒首曰即無身心之計數也曰賢者心知其滅耶曰心滅者不可得知曰其得致

都滅之心者彼永無有身識之得曰大辯哉輒首童子吾等微劣豈能應答上辯之辭輒首又曰云何迦葉響寧有辯耶曰無童子因緣起耳曰不云乎惟大迦葉一切音聲若如響耶曰爾輒首又曰響辯可致不乎曰不可致又曰如是惟大迦葉菩薩挾懷權辯之才不可思議亦無其斷若耆年問從劫至劫菩薩機辯難可究盡也爾時迦葉而白佛言惟願世尊加勸輒首爲此大衆弘講說法令諸會衆長夜致安普使一切得明法要於是衆

中有大菩薩其名智積問輒首曰何故童子
長老迦葉年耆極舊所言怯弱微劣乃爾爲
以何故名之耆年輒首答曰是聲聞耳故不
果辯智積復曰斯不知發大乘志耶曰永不
矣惟以聲聞乘之脫也曰又輒首何故名爲
聲聞之乘輒首答曰是族姓子世尊能仁隨
諸衆生興三乘教敷以說法有聲聞乘緣一
覺乘及大乘行所以然者由此衆生意多懷
貪志劣弱故說三行耳智積又曰云何輒首
如空無相願都無其限何故限之有三乘乎

曰族姓子是諸如來執權之行空無相願不
有其限爲諸著限而有諸限終不限於無限
行也曰又輒首吾等可退使永莫與劣志衆
生得有會也輒首答曰諸族姓子且忍當從
無熱龍王聞其智辯及無量法耆年迦葉謂
智積曰云何正士如彼寶英如來佛土云何
說法智積答曰惟一法味從其一法演出無
量法義之音但論菩薩不退轉法諸佛與藏
要行之論從已取脫不由衆雜依於普智永
無餘脫恒講菩薩清純之談其土都無怯弱

之行也時阿耨達問輒首曰仁尊輒首來奉
如來爲何等像觀於如來以色觀耶痛想行
識觀如來乎答曰不也以約言之色苦觀耶
痛想行識苦觀之乎滅色痛想行識觀耶爲
以空無相無願行觀如來乎答曰不也又問
云何去來現在相好肉眼天眼慧眼觀如來
十三
乎答曰不也云何輒首以何等相觀如來耶
答曰龍王觀於如來當如如來又曰輒首如
來云何乎曰如來者無等之等等不可見用
無雙故妙矣龍王如來極尊無偶無雙無比

無喻無時無等無匹無倫亦無色相爲其無
像無形無影無名無字無說無受也如是龍
王如來若此當作是觀觀於如來亦不肉眼
天眼慧眼而觀如來所以者何其肉眼者以
見明故如如來者無冥無明故不可以肉眼
而觀又天眼者有作之相若如來者等過無
住故不可以天眼而觀又其慧眼知本無相
又如來者衆都永無故不可以慧眼而觀云
何輒首觀其如來得爲清淨曰若龍王其知
眼識心不有起又知色識心無起滅其作是

觀觀於如來為應清淨爾時其從寶英如來
寶飾佛土菩薩來者得未曾有而皆歎曰甚
快妙哉斯諸衆生善值如來逮聞如是龍王
所問決狐疑品聞已悅信不恐不怖又無驚
怪加復受持諷誦宣布如是正士應在慧署
吾等世尊不空至此值聞是要無極像法又
若世尊斯法所至聚落國邑當知其處如來
常在終不滅度正法無毀道化興隆何則然
者以此法品能降魔場伏諸外道也時阿耨
達謂輓首曰善修行者輓首童子斯之菩薩

逮聞是法得佛不難進已勸人勤道無倦也
何謂菩薩應修善行輓首答曰若是龍王如
貪行空施行亦空等解於此是謂善行以約
言之不戒與戒懷恚及忍懈退精進亂意一
心如其愚空智慧亦空於是等行斯謂善行
又復龍王如其姪欲恚怒愚癡為之空者無
其姪欲恚癡亦空如叅行空無雜亦空於其
等行是謂善行又復龍王如其八萬四千方
空賢聖正脫亦悉為空於斯等行是謂善行
又復龍王若有明賢修菩薩行無行無不行

三

十四

亦不見行不有惑行亦無念行又不知於是等行是謂善行無熱龍王謂輓首曰云何童子菩薩行於無所行乎答曰龍王若初發意行菩薩道至得佛坐所行功德悉由初行不生之行無受處行無護捨行無隙之行又無著行亦無諦行無有限行亦無惑行又無婬行無所作行亦無持行無審之行亦無底行是謂菩薩無行之行若菩薩以不生之行無行不行得三十七品無所造作以慧而脫永脫於脫不過二際明了本際而不取證菩薩

作是此謂菩薩得不起忍如斯之行此謂善行說是語時三萬四千天龍鬼神菩薩行者逮無從生法樂之忍

三昧弘道廣顯定意經卷第三

世三

十五

三昧弘道廣顯定意經卷第四

絲四

西晉三藏法師竺法護譯

不起法忍品第九

時阿耨達謂賴首曰不起法忍當云何得乎
賴首答曰忍不生色痛想行識是謂菩薩得
不起忍又復龍王菩薩所得不起法忍等見
衆生以致是忍等彼衆生如其所生等見衆
生亦無有生等見衆生以如自然等見一切
若如其想亦不與等而見其等是謂菩薩等
見忍空云何爲空眼以色識耳之聲識鼻而

香識口之味識身所更識心受法識如諸情
空其忍亦空過忍亦空現忍亦空如其忍空
衆生亦空何用爲空以欲爲空恚怒癡空如
衆生空顛倒亦空欲垢起滅亦悉爲空作是
智行斯謂菩薩行應不起法忍之者其等衆
生已應向脫何則如是又彼菩薩而作是念
如其已空至於我垢及諸衆生空無所有御
欲如此是欲已脫於本自無一切衆生如此
之忍於欲自在已脫是欲根寂無處其永不
滅無脫不脫亦無有得至脫者也若斯永脫

則彼是故住處自然又此龍王若有菩薩行
應忍者拔度一切不有其勞所以者何見諸
衆生本都無縛於本自脫彼作此念是諸衆
生悉著一欲行者不著而脫本法一切衆生
著其不諦妄想之念菩薩了此終始無著已
脫法本又復龍王得不起法忍菩薩者雖未
得達佛要行處然是菩薩不住凡夫學無學
處普入諸處習度無倦不於欲處有其淫行
恚處不怒癡處不愚不於處所以無欲住離
衆欲際御持諸性導化衆生自無欲垢貪著

穢行彼於魔界及與佛界并自然相而無疑
惑亦不念其法性之處普現於彼衆生之界
了知諸處法非法處曉入行處以慧而觀於
行之處及生死處亦不生死入隨生死所在
諸處爲造得本守靜不疲解知生死而無生
死不以賢聖修應而脫時阿耨達謂輒首曰
如仁輒首而作是言菩薩不以修應向脫其
曉是學斯則菩薩修應向脫何謂菩薩修應
向脫輒首答曰得不退轉是謂菩薩修應向
脫又復龍王菩薩曉知有念未脫爲諸隨念

終四

二

衆生等故建立精進化轉無念言有吾我亦
爲未脫又復龍王其菩薩者已無吾我向諸
縛著衆生類故爲起大悲而以度之彼見生
死都無生死生諸所生以其無生衆生無生
而皆等見爲諸倚著衆生之故現生受身永
無其生亦不有終是慧菩薩應修向脫執權
而還還住生死現在所生受身之處濟化愚
冥導以智慧得免罪苦菩薩以空故應寂向
脫以權而還返于生死爲諸衆生興發大悲
菩薩無相修應向脫弘權而還還遊生死向

諸隨念衆生之故爲起大悲菩薩無願修應
向脫執權而還還住生死爲諸隨願衆生之
類向發大悲化行無願脫乎龍王菩薩解入
無所有法不捨衆生入於無我及人命壽不
忘道場曉入無量果致大人三十二相終寂
然四
靜寞無寂不寂亦無其亂等過諸行無心意
識不違本願昇普智心等離衆念權曉衆生
種種意行得賢聖者及非賢聖勤以精進立
正聖法無淫佚行建志不捨寂與不寂等皆
濟護無念不念其不整者佛土莊飾嚴整立

之過俗向脫脫不離俗如是龍王以執智權有賢聖定是爲菩薩修應向脫譬如龍王聲聞之行修應向脫名曰往還以成其道不能前進發於無上建立大悲而化衆生如其菩薩亦應修脫無復動搖成不退轉往還乎龍王修應向脫無疑會當得至道果又如菩薩修應向脫都不忘於聲聞之果受菩薩道以是聲聞修應向脫爲有其限如菩薩者永無其限譬如龍王有二匹夫在峻山頂而欲自投其一人者力羸勇悍權策通捷宿習機宜

曉了諸變無事不貫從其峻山而以自投忽爾復還住彼山頂由其勇勢爽健猛達身昇最力輕羸翻疾強果所致而使無墮亦不所住如其一人志怯意弱亦無權謀於其山上不能自投如是龍王其菩薩者於空無相願觀觀諸法無所作念如是觀訖又復能以權慧之力爲衆生故住普智心其峻山者謂是無數其慧博達顯大力者譬執權慧行菩薩也字修權慧菩薩行者不處生死不住無爲是謂菩薩被普智鎧而入生死抽拔衆生令

發菩薩大乘之行其劣弱者住彼山上不能
返還譬之聲聞不入生死無益衆生若是龍
王其有菩薩聞是脫慧要行品者斯輩世尊
皆得堅固於無上正真道意疾近佛座濟度
三界說是法時會中菩薩等七千人得不退

然四

轉

衆要法品第十

時阿耨達龍王太子其名感動前白佛言今
吾世尊以無貪心自歸三尊願使是經人住
於世護正法故惟世尊志發無上正真道意

願造斯行樂興建之得了心本明曉道本及
諸法本自致成佛最正之覺當廣宣道化潤
衆生又惟世尊其諸菩薩聞此清淨大道法
品而不信樂不奉行者當知斯輩菩薩之類
爲魔所馱亦不疾近普智心行所以者何從
斯世尊法品要義出生菩薩自致成佛伏魔
外道去來現在諸佛正覺皆由是法爾時賢
者須菩提謂太子感動如仁賢者了解心本
明盡道本及諸法本若得成其覺諸法者此
何心本而得了耶曰其本者惟須菩提是之

本者以心本也須菩提曰心為何本曰本者
乎淫怒癡也曰淫怒癡為何本耶曰以念無
念為本也須菩提曰云何賢者淫怒癡本為
從其無念興起生耶曰須菩提淫怒癡本不
念無念亦無生也又其本者不起為本又須
菩提所可言者此何心本為心本者其本清
淨斯謂心本如本清淨彼無姪欲恚怒癡垢
曰族姓子欲生起生彼從何生而常生生如
無斷耶曰須菩提其欲當生而已生生於心
本者不有著生惟須菩提若彼心本有其著

者則終無致至清淨者是故心本都無著也
由是知欲亦為清淨須菩提曰云何族姓子
了知欲耶曰以因緣之起生也其無因緣為
無有生惟須菩提修淨念者了欲無也須菩
提曰又云何乎族姓子菩薩為應修淨念耶
曰須菩提菩薩於行而修諸行是謂菩薩修
淨行者也惟須菩提其有菩薩都為衆生被
大德鎧化至泥洹等見衆生本如泥洹是則
菩薩修淨念行惟須菩提其菩薩者為諸聲
聞及緣一覺隨應說法不隨是化斯謂菩薩

修淨念行惟須菩提又彼菩薩自取其欲靜
衆生欲是謂菩薩爲修淨行又須菩提其菩
薩者在於淨念而見不修又於不淨而見修
淨是謂菩薩修淨行者爾時須菩提謂王太
子感動曰又云何乎族姓之子菩薩於淨而
見不修於其不修見淨修念曰須菩提修淨
念者謂修眼色耳聲鼻香舌味身更心所受
法見悉不修法性無二謂修三界不著是菩
薩住住以善權斯曰修念菩薩作此行須菩
提則謂修淨念行者也於是世尊歎太子曰

善哉善哉如若正士感動所言修淨如斯是
爲菩薩應修淨行今若所說皆佛威神其有
菩薩修行如是此乃應興大衆之行當知斯
輩堅固普智於是太子感動白佛云何世尊
菩薩得以無欲之心應自歸佛曰族姓子若
有菩薩了知諸法無我人壽無色無想亦無
法相不於法性而見如來如是菩薩爲應無
欲自歸命佛如如來法彼則法性如其法性
爲普所至有得致是法性之法則知諸法斯
謂菩薩以無欲心應自歸法其法性者彼爲

無數習無數者即是聲聞又如菩薩等見無數於其無數而不有數亦不二者斯謂菩薩以無欲心應自歸衆說是語時太子感動得柔順忍來會色欲諸天龍人聞此法品等二萬衆皆發無上正真道意

受封拜品第十一

爾時龍王阿耨達與宮夫人太子眷屬俱而圍遶自歸三尊都以宮室并池所有供奉世尊及比丘僧以爲精舍又復言曰吾今世尊興發是願從斯大池出流四河充于四海從

其世尊四河之流若龍鬼人飛鳥走獸二足四足有舍命類飲此流者願其一切皆發無上正真道意宿不發者飲此水已使成其行速在佛座降却魔衆伏諸外道時世尊笑諸佛笑法口出五色奮耀弈弈光燄無數震照十方無量佛世明踰日月須彌珠寶諸天魔宮及釋梵殿一切天光盡翳無明是時無數億千天衆莫不懷悅發願聖覺光徹阿鼻諸大地獄有被明者尋免衆苦皆志無上正真道意還遶世尊乃無數帀忽從頂入爾時賢

者名曰披者此言辯解見其光明輒從座起整著衣服偏袒右臂向佛跪膝恭檢叉指歎頌世尊而以問曰

其色無量見者悅 人雄至最獨世尊
滅除衆冥興大明 執持威神說笑意
百福所詠得七滿 得智光明演慧行
爲法上講唯法王 世尊今笑何瑞應
具見誠諦當樂信 根定寂靜衆惟敬
化度一切以寂然 德過無極說笑故
梵聲清徹甚軟和 驚音商雅踰諸樂

衆音備足無缺減 解散笑故宣布示
智脫之明應慧度 行常清淨樂憺然
權曉衆行普智具 賢聖道王說笑義
智辯通達慧無極 現力無量神足備
十力已具普感動 天師現笑用何故
身光無數照窈冥 大千衆明不能蔽
踰越日月及珠火 威聖之光無等倫
功德滿足若如海 順化菩薩以智明
壞慧無限散衆疑 興發何故而有笑
尊度二界無有極 權導衆生除諸穢

能淨欲垢化無欲

天顏含笑爲誰興

如來所由普感動

震動天龍諸鬼神

稽首虔禮於法王

蒙說笑意決衆疑

是時佛告耆年辯辭賢者汝見阿耨達不供

如來故造此嚴飾曰然世尊已而見之曰是

龍王已於九十六億諸佛施種德本今受封

拜如吾前世爲錠光佛世尊之所授決汝當

來世得致爲佛號名能仁如來無著平等正

覺通行備足爲最衆祐無上法御天人之師

號佛世尊是時龍王爲長者子其號名曰比

守陀末

此言淨意

聞吾受決尋轉興願使吾來世

得其拜署若斯梵志爲是錠光佛所決也爾

時淨意長者子者阿耨達是又斯龍王當於

賢劫在此池中莊飾種種鮮文衆寶若天宮

室當悉進奉賢劫千佛斯諸如來盡知王意

率皆說此清淨法品悉坐是處等亦如今又

及如前拘樓秦佛文尼迦葉同共坐此師子

之座及其最後樓至如來亦當轉此法品要

義無熱龍王當供養賢劫千佛從聞是法諸

佛衆會衆同如今是阿耨達後無數世奉諸

如來事衆正覺修梵淨行常護正法勸進菩薩然後七百無數劫已當得爲佛號阿耨達如來無著平等正覺通行備足無上法御天人之師爲佛世尊如是賢者無熱如來得爲佛時其土人民都無貪婬恚怒愚癡永無相侵不相論短何則然者以彼衆生志行備故如是賢者阿耨達佛至真如來乃當應壽八十億載弟子之衆亦八十億如其始會之爲清淨從始至終無異缺減如此之比數百千會富有通辯受決菩薩四十億人都悉集會

又諸發意菩薩行者不可計數無熱如來當爲佛時其土清淨紺瑠璃地天金分錯飾用諸寶以衆明珠造作樓閣及經行地彼土衆生若興食想應輒百味悉得五通其國處所人民居止但以珍奇被服飲食娛樂自由悉如第四兜術天上彼不二念又無貪欲婬行之心如諸衆生法樂自娛其土人民都無欲垢若彼如來敷兩法說不有勞想神變無數以演洪化宣示經法永無其難方適說法衆生輒度何則然者以彼一切志純熟故又其

如來自於三千大千世界唯一法化無外異
道又若如來欲會衆時輒放身光盡明其界
彼土人民尋皆有念世尊聖覺將演法化故
揚光耳各承佛聖神足飛來詣佛聽法又彼
如來終無不定乘大聖神忽昇空中去地七
丈就其自然師子之座廣爲衆會進講法說
普土見之譬如覩其日月宮殿明盛滿時衆
生種德故生彼土其國人民觀其世尊師子
之座懸在虛空而無所著尋解諸法亦空無
著當爾之時悉得法忍其如來者但說金剛

定入之門不有聲聞緣覺雜言所以唯演金
剛定者譬如金剛所可著處靡不降徹而彼
如來所可說法亦如金剛鑽碎吟疑住著諸
見如是賢者阿耨達佛若現滅度而其世界
有尊菩薩名曰持願註四當授其決然後現滅其
佛方滅持願菩薩即得無上最正之覺十尋補
佛處號曰等世如來無著平等正覺其土所
有神通菩薩及上弟子衆會多少如阿耨達
時阿耨達王之太子名曰當信敬心忻悅以
寶明珠交露飾蓋進奉如來叉手白佛誰當

於時得為持願菩薩者耶是時世尊知王太子當意信向告阿難曰其時持願菩薩大士當補佛處者今龍王子當信是爾時阿耨達如來方滅持願菩薩尋昇佛座入其等世如來無著平等正覺方適得佛亦便轉此法品正要當佛說是封拜品時四萬菩薩得無從生忍十方世界來會菩薩釋梵持世天龍鬼神聞佛說此封拜法已悉皆喜悅歡心踊躍信樂遂生五體稽首各還宮殿阿耨達王與諸太子眷屬圍遶勅伊羅蠻龍象王曰為如

來故造作交露奇珍寶車使其廣博殊妙無極當以奉送至真正覺尋應受教輒為如來化作七寶珠交露車今極高大廣博嚴飾世尊菩薩及諸弟子悉就車坐無熱龍王太子眷屬心懷恭恪手共挽車從其宮中出于大池如來神旨忽昇鷲山

然四

十一

囑累法藏品第十二

於是世尊到鷲山已即告慈氏輒首童子并眾菩薩曰諸族姓子以阿耨達所問道品宜重宣廣使諸未聞而得聞之慈氏輒首而俱

永樂北藏

三昧弘道廣顯定意經

第五一冊

白佛惟願如來垂慈當說於時世尊尋輒揚
光光色無數天地震動至十六返光明昱爚
乃曜十方十方佛土諸尊菩薩神通備者尋
明飛來到皆稽首各便就座王阿闍世夫人
姝女太子眷屬舉國臣民長者居士梵志學
者見是光明又聞如來從無熱還各捨其事
悉詣鷲山到世尊前肅然加敬叉手為禮問
訊如來景福無量乎即便退坐觀佛無狀如
來身光明悉普至無極世界諸大地獄衆窻
冥處靡不降徹諸在地獄無不被明又其光

明而出聲曰能仁如來於無熱池弘說清淨
道品要法今還鷲山而重演化又其音聲徹
諸地獄十方地獄衆生之類所受苦痛應時
得免悉遙見佛及諸衆會皆悉悲嗟嗚呼世
尊吾等受此苦痛無數地獄之酸六火圍遶
燒炙苦毒鋒創萬端鑊湯之難諸變種種更
斯衆痛日月彌遠善哉世人值奉如來稟佛
道化得脫三苦吾等宿世雖遇諸佛不受法
化使被衆苦痛蒙賴如來所說法品令諸殃
罪而轉微輕當爾之時十方地獄一切衆生

得等有億千悉發無上正真道意遙承佛聖
皆同聲曰一切苦痛本爲清淨其了本者則
無顛倒吾等但坐不了之故更諸地獄衆苦
無數願使一切速解正真爾時佛告慈氏苦
薩輒首童子及阿難曰諸族姓等當勤受此
是經要說持諷讀誦以宣流布廣爲學者演
說斯法使諸四輩加心專習是慧要行積辯
句義若族姓子及族姓女發心怡悅向樂是
經當爲斯輩解此奧藏深邃諸義道之淵府
衆經所歸諸佛積要微妙無量若所授者當

令字句了了分明使無增減又諸族姓若賢
男女在於過去恒沙諸佛所作功德施行種
種受持諸佛所可說法一一專習勤心奉行
若復施戒忍進定智行是六度億百千劫奉
是諸佛并衆弟子衣被飲食牀卧醫藥香華
妓樂進諸所欲又造精舍經行之地奉敬如
是不可稱計至諸世尊般泥洹已爲諸如來
起七寶塔一一供養諸如來塔香華妓樂繒
綵幡蓋進然香燈又懸夜光明月諸寶供養
如是極多無數斯所德行集會計之都不如

是族姓男女逮得一聞此阿耨達龍王所問
決諸狐疑法品義也所以者何以斯法藏出
生諸佛菩薩要行慧之最故何況奉持執卷
讀誦以無疑心體解深妙復以所聞宣示流
布斯諸功德不可測量是時慈氏輒首童子
賢者阿難俱白佛言是未曾有唯然世尊又
若如來慈降一切興有大悲乃爲十方去來
現在菩薩行者天龍鬼神諸衆生故弘說是
法無極清淨道品之義又復世尊若族姓子
及族姓女聞阿耨達龍王所問決狐疑經不

十三

十三

即受持樂習讀誦又不廣傳布示等學亦不
興心勸助之者當知是輩族姓男女已爲衆
魔及魔官屬并邪外道之所得便常在羅網
結疑中也時佛歎曰快哉所言誘進一切使
習斯法令行應之如如又曰當以是經數爲
四輩廣宣說之爾時慈氏輒首菩薩賢者阿
難皆白佛言唯然世尊輒當受持布演是法
又復世尊此經名何當云何奉持世尊告曰
斯手族姓名阿耨達龍王所問決諸狐疑清
淨法品亦名弘道廣顯定意當勤受持斯經

之要又族姓等是道品者珍護諸法經之淵海也慈氏菩薩輒首童子及諸來會神通菩薩釋梵持世天龍鬼神同聲白佛甚善如來快說是法吾等世尊在聚落國界縣邑有行是法當共躬身營護斯輩其聞此者令無邪便吾等亦當受持是經使普流布而常無斷佛歎慈氏輒首童子并眾菩薩曰善哉也諸族姓子卿等所言勸樂將來諸學菩薩快甚乃爾佛說此已十方來會神通菩薩七萬二千悉建顯定五萬四千天龍鬼人皆發無上

正真道意五千天人得生法眼阿耨達龍王慈氏菩薩輒首童子一切菩薩賢者阿難來會四輩及諸天龍種種鬼神人與非人間佛說是莫不歡喜稽首佛足各便而退

三昧弘道廣顯定意經卷第四

音釋

註四

十四

洪夷質切 顛平義切 悍侯肝切 性馬鵬甫幽
放也 顛作力貌 悍勇急也 性切
我羊益切 憺徒覽切 昱昱余六切 燐昱余六切
盛大也 憺恬靜也 昱切 燐切
先明照 窈烏皎切
耀也 窈幽也